

A Monthly Christian Magazine

AN ORGAN OF THE ZOU PRESBYTERIAN CHURCH SYNOD



Khristian Tangkou

Vol. 53 || No. 09

September, 2017

ZPYF LAKUTPI 2018 SPORTS



Editor: Rev. Stephen Chinzathang

Synod Kumpuon: **“Ga ding a tel ihi”** (John. 15:16)

Khristian Tangkou

Vol. No. 53 | Issue No. 09 | September, 2017

Editorial Board

Editor : Rev. Stephen Chinzathang
- 9863042789
st_stephen@yahoo.com

Joint Editor : Rev. Khanchinkhai - 0730933744

Circ. Manager : Upa Jamsanlung - 9862086615
alsanlung@rediffmail.com

Bus. Manager : Kamgenpa - 0974612937
Sye T. Gimsahau - 0974438842

Cont. Editors : Upa S. K. Khama - 986406454
Rev. Awnkhankhup - 9862028921
Rev. M. G. Nehlan - 09535042257
Rev. Kaimaanal - 9862923960

ZOU SYNOD ULIENTE

- **Moderator:**
Rev. Mangsuanthang
- **Moderator Elect:**
Rev. Awnkhankhup
- **Secretary (Sr):**
Upa Sianzahau
- **Secretary (Jr):**
Upa Thangchinmang
- **Treasurer:**
Upa Chinsuanthang
- **Statistician:**
Upa S. Nangkhanial
- **Executive Secretaries:**
Rev. Stephen Chinzathang
Rev. Khanchinkhai

A sung thu

- Editorial..... 01
- Thu tuomtuom 03
- Dan leh nam kibahlouna 05
- Leitung Hattuum tuomtuomte 09
- Ginna ha in leng va ui 13
- Lung-awi louna khovel..... 15
- Thuohna khu Guolzawlna.....17
- Mangpa Nasep ding dan 19
- Muoltung a Jesu thugente 20
- Kipah thugenna & ZPWF Cumlumn... 23

Copies - 1100

AMAN

Kumkhat ah	- ₹ 100.00
Post ah	- ₹ 200.00
Copy khat ah	- ₹ 10.00
Life Member Fee	- ₹ 1,000.00
Patron Member Fee	- ₹ 2,000.00
Memorial gift	- ₹ 2,000.00

Thusuo zosie Editor leh Zou Synod
ngaidan ahi kimsih a, a suotute'n maw
a kipuoh chiet ding uhi.

Thusuo dingte Editor kung a pieh
ding ahi.

Published by: The Zou Presbyterian Church Synod, Zomi Colony, Chanchandpur, Manipal-795128



Editorial

Mangpa Pasion gingtu khat na hina ah nangma na kithei chieng tai?

Tulai Khovel i etleh mipi tamtah te theilou, chienglou leh theisim theilou sim toh i buoi uh hi chiin akimu theita hi. Zou kamteng/kammal khat in tambang thu a um ngai hi. “Zeldim thu bawl” nahkuo nuoi kam vang thugen chin zong gen thei ahi. Tulai khovel kithuzah tuona Newspaper, TV, Twitter, Facebook leh a dangdang zong tamtah a um tahi. Tua ahi lai in tulaitah a silkhat poupou chiengtah leh adih ahi chi theisahna leh amun ma a ki enthei bang a kilang LIVE chi zong aum hi.

Tuamabang in tuni in eite Mangpa Pasion hing bete bang dinmun a um ihi uoi chi i theichieng ding uh a kul mama tahi. Pasion ta hina ah nang leh nang na kithei chiengtai? Pa/Nu na hina ah na hina na kithei chiengtai? Tapa/Tanu na hina ah na hina naki theichieng tai?

Khotaang hindan ah zong Pawl khat Society khat lamkai a um nahi leh na sep ding pen naki theichien tai? Social Organisation khat in Philanthropic (Tawmngaina) Organisation nna asep ding hilou hi.

Political Party leh Politician ten zong sil amauh line loute a sai seng ding uh hilou ahi. Politician pan Hattuum a mawpuohna Local, District, Presbytery, Synod leh atung lam a sangzaw te a mawpuohna a nei tahleh zong a panna Pawl/Organisation tup leh ngim leh a sep ding te uh hoitah khat a athei chien ding ahi. Tua hilou a Singzu/mete

kihalpawl bang a theizousie thuzah zousie gamgi neilou keei a moh khuonkhuon thei ding ahisih.

Tulai a ei gingtute pen Pasian thei kisa mama in Pasian ahinate (Essence) mangkam a kigente leh Pasian Zepi (ahina tah) te i theilou zieh un Pasian khu bom sung a khum theigiep in i koi leng uhi.

Bom (Basket) sung a thungpi (Bag), box (singkuong) book (laibu) sung a Pasian khum/koilut thei ding giap a i thei zieh ua ei gingtute Pasian thu gintat dan leh hinpi dan detdou theilou ahi. Tuazieh in Mangpa na gintat na pen tam khovel/vannuoi leisiet te tunglam a pat hing mapui hing veng leh hing enkol zing Pasian khu ahi chi thei chet sawm vai.

Mangpa'n hing mapui in hing umpi zing taken.

SUHDIHNA (CORRIGENDRUM)

August issue a V. Bethel Biehin kot Honna a silpieh kisuo a Lamka District Pate Rs. 100 kichipen Rs. 1000 chiding hizaw.

ZPYF LAKUTPI VOLLEY BALL TOURNAMENT - 2018

CHAMPIONSHIP RESULT:

- | | | | | |
|-----------------|---|------------|---|----------------------|
| 1. Pasal | : | Winner | : | PYF, Lailam veng (B) |
| | | Runners Up | : | PYF, Lailam veng (A) |
| 2. Numei | : | Winner | : | PYF, S. Vengnuam |
| | | Runners Up | : | PYF, Central Church |

Thu tuomtuom leh Thumpi dingte



01. Ngetna leh theisahna: Zou Synod huong sunga Pastors & Upate kung a ngetna leh theisahna i Khristian Tangkou a hachin a kisuo (Monthly Herald) ding article Pasian thu Sermon tomkim a hing giel dingin ikingen uhi.
02. Synod Year Planner umsa bang in September 01-24, 2017 sung teng Hattuum chin a Sepguol vaiguon eima lohpi thei ding deina toh eima lemtan dan bangzel a thum kawm a zang leh mang chiet dingin ikingen uhi. Thupi: “Ga ding a teel ihi”
03. Pasian in leivui apat ang lapsang hun Synod Day ang tung ding September 10, 2017 eima lemtan dan bang zel a Pasian thupina piehni a zang chiet dingin Hattuum zousie deisahna sangpen ka hing pie uhi.
04. Synod Year Planner a umsa bang in District chin a Sepguol kisuhtuona September 24, 2017 ding ahi. Tualeh District chin Presbyterian Youth Fellowship (PYF) kumsim khawmpi September 29-October 01, 2017 tan dai ding ahi. Thumna toh kisakhol kawm in bawzui chiet vaui.
05. ZPWF Tour: Pasian in i thumnate hing dawng in - ZPWF lamkaite panlahna toh Synod huong sunga District chin vehna Tour Programme dated 21st May 2017 nia Singngat District

Mongken Hattuum a apat uh Pasion mapuina toh Dated 20th August 2017 niin ImphalHattuum ah zoukheta uhi. Thupina zousie Mangpa'n tang hen....! Ama ban uah Pasion nna sepna ding sahtah um a, ini chin thumna toh bawzui chiet vaui.

06. ZPYF Lakutpi 2018 Audition pei lel: ZPYF: 'Lakutpi' 2018 lohtah leh lawching taha zah leh man ahitheina ding deina toh khopi sung Hattuum leh District Head Quarter teng ah Lakutpi 2018 auditon 1st Round zou siengta uhi. Maban sepkhiet ding satah aneite uh ang sepzou theina ding un thumna toh ana pang chiet vaui.
07. ZPYF a member poimaw mama Mr. Samuel Khamsuankhai Music lam toh kisai in United Kingdom (UK) ah Dated 16th August 2017 niin kipankheta avaikuon, avaitun lamzang tah a ang lawchin theina dingin ana thumpi chiet vaui.
08. Khopi sung leh Singtang mun tuomtuom a Pasion bieh leh phatkhawmna ding hoizaw leh kilawm zaw deina toh i pawlpi sung a BIEHINN lamtu tengteng a din thumpieh vaui. Tambang silhoi nna iseplai un i langpa Setan kigol nuom mama hi. Thumsahna loungal i panpi theina dang umlou hi.
09. I huon hai, bu leh baal kinepna lienpi toh ingahla mama uh Pasion khut hat a kepbitna toh ga nempi suong a, Pasion mai a latna leh kipahthu genna itan theina dingun sil bangkim bawlthei Pasion kung ah thu ngen vaui.
10. Dated 21-23 sung Synod Campus ah Lakutpi 2018 cheplohma leh ZPYF Day kisuhhalna in Volley ball kimawlma um hi. Etnop huoi mama hi.

.....

DAN LEH NAM KIBAHLOU ZIEH A SIENGLOU KICHI MITE LEH MANGPA JESU

-Pro.Pastor Khupsianlal

Thupatna:

Laisiangthou isimchieng un, dan dungzui leh nam kibahlou zieh a sienglou/abuo a ngaituo mi tampi muthei in um ua, khumte khu numei sineinu (Mak 5: 25-34), Samaria numeinu (Johan 4: 1-42), Kanaan numeinu (Mathiu 15: 21-28) leh atuomtuomte kimu hi. Tam numei thum itahlatte uh pansan in Mangpa Jesu ngaituonadan enkhawm u'lei deihuoi isa uhi.

Dan dungzui leh nam kibahlou zieh a sienglou a ngaituo mite Judate ngaidan:

Dan dungzui in:

Hebru Bible akhun koi amah khat in mishi luong ava thamkha ziehin buo thei a, gan shisa thamkha zieh, phahnatna veite vatham kha leh nehloou ding sil vaneh kha ziehte in buo in sienglou thei uhi. Sil khenkhat asiengthou banga ngaituoi ahilai in, abuo leh sienglou mikhat vatham khah ziehin asienglou suoh zel hi.

Nam kibahlou zieh: Thuhun Lui a Judate'n sil anehthei ding u'leh anehthei louding ua dan kipieh khun amaute pen nam sang/dinmun sangtah nei leh Pasian namteel ahidan uh thei uhi. Nehthei dinga silsiengthou te khun Israelmite a ensah a, tualeh silsienglou te khun Jentel namte a ensah kia hi. Tuaziehin Jentel namte khu nam siengloute chithehi ahi uhi.

Numei sinei nu (Mak 5:25-34) :

Tam siltung khu Mangpa Jesu'n Jairas tanu damna peding a

ava kalsuon lai a siltung ahi. Numei sinei nu khun Mangpa Jesu puonmong thamkha leng damding kahi chi gintatna/ginna lienpi nei hi. Ama khun Mangpa Jesu puonmong neukhat maimai a suhkha ziehin damsiengna neiding kahi chi gingta in tuachi'n adampi ahi. Tuaban ah tam numeinu khun Judate dan dungzui a amakhu asienglou a ngaituo hinanleh Mangpa Jesu avatham khah zieh a Mangpa Jesu zong asienglou banga mite'n ngaituo ding uh ahidan athei a, tualeh midang athamkhah zousiete zong sienglou ding uh ahidan thei mama hi. Judate dan dungzui in numei in hachin si/nin anei chieng un Pasian toh zong kihou theilou leh midangte lah ah aumding uh phal ana hisih kichi hi. Tuabang ahitah leh tam numei sineinu khu mipite lah apat kum sawmle kum ni (12 years) atuom koikhiet uh china suoh hi.

Numei sineinu khu midangte nuolna, ngaisahlouna, khotang silleh hattuom vai ah panmun bangma phal ana hisih hi. Tuazieh in zumna, kingamlana

leh kingaisietna ngen in kum 12 hun zang ana hinger ding hi. Tam numeinu khun damna amutah in Mangpa Jesu'n dan kisiem khellam ah numei khu mihonpi lah ah houpi in, aginna thupidan genpieh in damsiengta ahidan zong gen hi. Tualeh numei sinei nu'n athamkhah zieh a dandung zui a sienglou bangin aki gen sih hi. Mihingte'n vang ngaituona hoilou leh gintatdan dihlou tahtah inei ua, bang ahiei sil khat zieh in sieng leh sienglou bangin imihinpi khat imusawi zel uhi. Nanleh iMangpa Jesu khun numei sineinu kungah, "Tanu na ginna in ahing damsahta hi, hamuong tahin pei inlen, na natna akipat in damta in" achi hi.

Samaria numeinu:

Mangpa Jesu khun Judia gam nuasie a Galilee lam zuon a apei laiin Samaria gam tawn malam in pei hi. Tuanah Samaria numei tui tawiding a vakuonnu kungah dawnding tui ngen hi. Mang Jesu'n dawnding tui anget tah in Samaria numeinu khun lamdang sa mama mai hi, aziehpén dan dungzui in Juda pasalte khu Samaria mite

toh akihou ding uh phal ahisih ua, adiehin Samaria numeite toh houlim phal ana hisih hi. Tualeh numei khat adingin tuikul amatang a avaphah ding zong phal ana hisih hi. Tuabang ahitah leh tam Samaria numeinu khu numei dangtoh kibanglou leh aki pampai (social outcast) ahingei ding hi. Tam sil tungtang ah Mangpa Jesu khun Judate tawndan chini subei hi, khumte khu-Samaria mite toh houlim leh Numei toh houlim bawl ahi hi. Tahsa dangtah thu a kihoulimna tungtawn in Hagau lam sil houlimna suoh hi. Tuachia Mang Jesu'n apasal neidan ahoupai tah in Messiah ahidan hingthei khie hi. Tambanga akihoulimna uh tungtawn in Samaria numei khun pienthana nei in khosungmite'n zong Mang Jesu gingtat law uhi.

Samaria numeinu khu midangte'n apampai uh hinanleh lungliantah a hinkhuo zang numei ahi hi. Tuikul ah amatang in ava haw a, pasal te toh houlim bawl ngam in, pasal tampite toh hinkhuo ana zang hi. Ahindan thu ah midangte ginmawna

leh awimawna ana tang nanleh khumte zieh a lungke mailou in, ama leh ama khamuonthei in, atawp ah midangte adia kipahna thupha tuntut asuo a, Mang Jesu khu Hundamtu chi'n phuong uhi (Johan 4:42).

Samaria numei khu sil chi thum zieh in pampai in ana um hi: Samaria mi ahizieh, numei ahizieh leh numei kizuoh ahizieh ahi hi. Tuazieh in Mangpa Jesu'n tam numeinu ahoupai ziehin lamdang ana sa mama uhi. Nanleh Mang Jesu'n Samaria numei khu mihing bukim bang a ngaituo in pampai lou in midangte bangin houpai zaw hi. Tuazieh in Khantan Hoi kichi khun koima tuombawl anei sih a, michin adinga hundamna khu ahizaw ahi.

Kanaan numuinu:

Mathiu khun 'Kanaan Numei' ana chi ut zaw a, Mak in 'Syrophoenician' chi hi. Tuakhun numeite pen pasal lah a umtheilou, Jentel numei leh abuo/sienglou ahidan hingtheisah hi. Angetna khu Mang Jesun ana dawngpai sih

hi. Amasa'n Israel insungmite vah (feed) masat ding ahidan gen a, tuazaw a Jentelte hipan ding etsahna ahi. (Rom 1: 16). Numei khun hangsan tah leh kingiemkhiet tah in dawng hi. Mangpa Jesu khu numeinu dawngdan thupisa mama in atanu khu damsah hi. (Mathiu 15:28).

Mang Jesu leh Kanan numeinu houlimna tungtawnin bangtan chieng Jentelte'n Judate Messiah (David Tapa) apat silhoi muthei uh ahiei chi dohna piengsah hi. Mathiu in Kanaan Numei achi khun sil gen nei hi. Kanaan mite khu Thuhun Lui ah nidang apat Israelte melma (enemy) ana hizing uhi. Mang Jesu dawngdan tungtawn ah kinepna umlou bangin kilang a, Jentel te khu ui (dog) toh gente in umnalai hi. Ui khu Judate adingin gan sienglou ahi hi.

Numei khu Mangpa kengbul ah khupdin in, "Aw Mangpa David Tapa kei hing khotuo in, ka tanu dawimat in agim mama hi," achi hi. Kanaan numei khun Jesu khu Mangpa leh David Tapa chi'n

han hi. Tambang hatna (address) khu Judate'n Messiah ana hatna uh ahi. Tuabang a ahat vang in ama khu Kanaan numei ahi hi. Mang Jesu agintat ziehin atanu damlaw hi. Tam numei khu Juda hilou pulam mi, gamdang mi leh Judate houpi theilou numei ahi hi. Judate hi in Jentel hitaleh ginna dihtah neitute khu Mang Jesu nuazui dihtah ahi uhi. Tam tangthu tungtawn ah thaneilou numei te khu thanei leh silbawlthei ahizawh dan uh genlang hi.

Tam numei khun Juda namsung mi ahiloudan theinanleh atanu damna ding deina'n gamgi kantan in vangen ngutngut zaw hi. Midang huot numei hinanleh aginna aletseng zieh in lawchinna muthei hi.

Thukhumsin:

Pasian lim leh meel puo a siemte ihilai un atunga igenbang un, khotang a hatlate, migentheite, natna zauhuoi veitute leh numeitekhu nuoinet leh simmaw in um leng uhi. Gingtute'n itheizing ding uh khu Pasian mitmu ah michin akibangsuoh

a, bang natna vei hiin genthei
mama nanleh koima khentuom
neilou hi. Tuazieh in koi hinanlei
ginna lienpi toh iMangpa Pasion
kunglam lungsim tahtah toh
zuon u'lei, Asilbawltheina

imuding ua, Kross silbawltheina
leh Itna silbawltheina te zong
imu ding uhi.

Simtu deitah, Mangpan hing
guolzawl hen.

Leitung / Khawvel a **Hattuum tuomtuomte** **KIVAIPUOH DANTE SUINA**

- Rev. Dr. Hangpi Manlun

1. Thumapui.

Hattuum khu Mangpa Jesu van a kazou 'Pentecost' ni-in ang ding khia hi. Tuami a kipatin Sawлтаhten mun tuomtuom ah Hattuum ang phut ua, tuachin Hattuum kikkaikhawmna masapen khu Roman Catholic ahiban ah Pope vaihawmna nuoi ah bangtan e khat aum hi. Tuami nua in, Martin Luther-in Hattuum peidan dih a sahlouna Thesis sawm kua leh nga (95) ang tahkhieh nua in, Roman Catholic Hattuum a kipat in hing kipawt doh in, tuin, Hattuum kivaipuoh dan tuomtuomte (Church government), leh doctrines (denominations) tuomtuom tamtah a umta hi. Ahin eima umna Hattuum leh kivaipuohna khu ahoipen in i ngai chiet uhi. Tualeh atangpiin, ei Khristiante lah ah, Hattuum kivaipuoh dan chili (4) in i khenthehi uhi. Tuate i suiding uhi:

2. Lamkai khat nei a kivaipuo Hattuum (Papal or Episcopal or Roman Catholic or Autocratic form of Government). Tam bang Hattuum kivaipuohna khu

unau Roman Catholic-te leh
Orthodox Hattuumten a zui
uhi. Amauhten, lamkaitu khat
chau Roman Catholic-ten a nei
ua, tuakhu Pope ahi. Tualeh,

Orthodox Hattuumten ahileh Patriarch (Patriak) a chi uh khu Hattuum lutang/lamkai lienpen in a nei uhi. Amaute ngaidan un, a lamkai liente uh khu silbangkim ah, thunei tawp nei in angai ua, amauten a utut in thupiehte a bawlthei ua, zong a sutop thei uhi. Amaute mudan leh pawmdan uah Hattuum pen leitung a, Jesu umna-le-tenna pawlpi a kimuthei pawl ahi chin a gingta ua, a Hattuum lamkaite uh zong Mangpa Jesu sih-le-tang a ding in angaimai ua, tuaziehin, a membrete un zong a thupiehte uh zong a kip a koiin a zui uhi.

Tuaban ah, Roman Catholic hattuum ki-vaihawm/puohna ah thuneina leh let-le-lalna a banban in a kiguolsuh diudeu uhi. Masanglai ngelin, Roman Catholic sung ah Laisiengthou thuneina sang in a Pope thuneina a sansah zawh hun bang uh a um mawh hi. Tuabanah, a kikhopna puidan uh ahileh (Liturgy) a simthaw leh gelthawte sim a zuite ahi uhi.

3). Bishop nei Hattuum a kivaipuoh (Episcopal form of Government). Tamte Hattuumte kivaipuohna ah khun, Hattuum

makaipi pen khu Bishop ahi. Tamnah Bishop leh siempute khu hattuum vaihawmna ah khun a thuneipen ahi ua, siempu hiloute in mawpuohna leh thuneina a nei tawm mama uhi. Ahin, unau Catholic-te pomdan bang a Pope bang a thunei vang ahi va-ia sih hi. Amaute ahi uhleh, Bishop nei leh ama lamkaina nuoi a kipuihuoi Hattuum ahi uhi. Bishop khu a damsungin a pangsih ua, a kiheng zelzel uhi. Aman, thuneina sangpen a tang a, ama nuoi ah, biehn lamkai/sia tuomtuomte in amau munchiet ah thu a nei uhi. Ahin thutanna pen Hattuum (Local Church) sang a sangzaw tam lamkaiten a nei uhi. Tualeh Bishop nei hattuumte ahileh, England Hattuumte, India gam ah Lutheran hattuum, Church of South India, Church of North India leh adangdangte ahi uhi. Ahin, a tung a i gente khu zong peidan tuomtuom anei chiet ua, a kibang chiet uh china vang ahisih hi.

4). Tuolsung Hattuum thuneina a kivaipuoh Hattuum (Congregationalist form of Government).

A tangpi in, Congregationalist i chite uh khu Roman Catholic,

Methodist leh Presbyterian hattuum chite a panglou/jaulou hattuumte ahi uhi. Tamte, Hattuum kivaipuohna sung ah koima a thunei tuom dieh, chi umvateh louin, tuolsung Hattuumte khu mani keng a ding in (Independent) ahi ua, thuneina khu Hattuum membarten a kibang in a neichiet ua, amau dei dandan in vai a kihawm chiet ua, atungua thuneitu ding tuom zong a neiva teh sih uhi. Tuaban ah, mundang a Hattuum dangte kivaihawmdante zong a enton vateh sih ua, amau deidan khu a thunei leh lal pen ahimai uhi. Lamkai a kiguot tah uleh zong damsung a ding in akiguot sih ua, hun bangtan e khat a ding in a kiguot zel leng uhi. Tuaban ah, mun dang a, a kizoppite uh toh zong alom (Centralist) a kipawlkhawmna chite a nei sih uhi.

Atangpiin, tami peidan zuite khu unau Congregational hattuumte leh Baptist Hattuumte a hi deu uhi. Amaute, pansan tangpi ahileh, Martin Luther in, Hattuum a siemphat lai a, gingtu zousie siempu ahitheh uh chi a ana zilsahna ah aki nga tangpi uhi. Tambang a Hattuum

memberte ngaipoimawna leh mipite vaihawmna leh thuneina (democracy) ngaisang leh uongbawltute zong ahi uhi. A langkhat lam ah, amaute khu tulai democracy dan in zong kivaihawm ua, thu khensat ding leh vaai thupi deu aum chieng in, hattuum miten' (vote) khiehna toh thu a khen uhi. Tualeh, hattuum miten amau pawlpi sung ah, amau mama in thuneina (right) a neichiet ua, a pualang a kipat leh a sunglam pan in zong koi e khatin va vaihawm khum in thu zong avaneikhum sih uhi. Tualeh, Mangpa Jesu Khrist khu hattuum lutangpen leh lamkaitu a pawm leh nei bangin kigen nan u'leh zong atahtahin vang, a Pastorate u'leh tuolsung hattuum sung ua a upate uh khun thuneina sangtah amauh local ah aneichiet uhi.

Amaute ahileh Protestan hattuum lah ah zong, a kikoi tuom dieh ua, ginna leh lungsietna uongbawltute ahiban uah, naupang baptistma apom sih ua, hattuum leh solkal (government) zong kizopna neilou chi a khentuom diehte ahi uhi.

Tuabanah, a kikhopna puidan

u'leh zuidan uh zong a zangkhamlam pang (fellowship type) bang deu ahi uhi. Pasion loupina leh patatna lampang zong a uong bawl ua, mani testimony-te gen in, Pasion Hagau Siengthou puina leh guoljawlna atan belap thute uh bang a uong gen uhi. Tuabanah, a Pasion biehna kipuidante uah, ging kilawm (music)-te tum in, kikoute, khut behte leh zalentah a Pasion bieh lampang zong a uongbawl uhi.

5). Khawmpi leh Committee/ Meeting thuneina a kivaipuoh Hattuum (Presbyterian form of Government). Presbyterian hattuum khu 'vaihawmna kizom tou sawng li/nga a mipite thatang a telkhiehte vaihawmna' chiin agen thei hi. Tami Hattuum kivaipuohna dan ah khun kumtop khawmpi palai ding a kiguot palaite leh committee member-te vaihawmna toh kipuihuoi a, kivaipuoh Hattuum ahi uhi. Pope leh Bishop nei hattuumte bang in thu nei tuom leh lamkai det a um tuom sih a, banah Congregational leh Local Church Hattuum-te bang a tuolsung khat Hattuum in thuneina tawp zong a nei tuomdieh sih hi. Mimal thuneina toh kivaipuoh a kalsuon hilouin

khawmpi leh committee/meeting member-ten thuneina sangpen anei ua, amaute vaihawmna toh ki-enkaw! ahi uhi. Tami, pawlpi kivaihawmna pen, local church/tuolsung khu biel/district khawmpi thuneina nuoi ah apei a, biel/district khu Presbytery thuneina nuai ah auma, Presbytery zong khu Synod etkawlina nuoi ah a pei hi. Tuachin, Synod zong, Presbyterian Church of India,(PCI), General Assembly, etkawlina nuoi ah aum a, tami khu India gam a Presbyterian hattuumte kivaipuohna sang pen zong ahi. Presbyterian hattuum kivaipuohna dan khu Bishop nei leh Congregational hattuumte kikal a pei ihi uh chilei i chi khiel sih ding uhi.

Tuaban ah, Presbyterian hattuum khu centralized a kipuo i hina tah khu i gam ua hattuum tamtahn zong amau hattuum kivaipuohna ding in ang zuipi ua, eigam ah khun hattuum tamzawte khu centralized a kipuo hattuum ahideu pen uhi. Tamkhu, hattuumte i hanta thuguh khat uh zong a chithe i ding hi.

6. Thukhumsin.

Awle, atangpi in leitung a

hattuom tuomtuomte kipuidante i genta ua, atangpi a etin tam kivaipuohna tuomtuomte khun hoina-le-hoilouna a neichiet ua, tualeh eima umna hattuom kivaipuohna khu a hoipen leh dihpen in i ngaichiet uhi. Tuabanah, tunia i kivaihawm dante u'leh kietkawldante uoh

eima hattuom kivaipuohdan khu i zuithei tahtah na uoi chi khu eima chiet i velchien ding uhi. Amin mai a Presbyterian hattuom a kiminvaw a, ahivang a midangte peidan leh tawndan a kilamkai ihi khah ding uh chi eima chiet i kivelchien ding uhi.

GINNA HAA IN LENGANG VAUI

Gul zat tuomtuom leh zauhuoi tahmai Africa gam apat Europe gam Vanleeng in ang kipuo ua, Vangsiethuoi tahin Gul (Snake) packing bawltan a box chabi ana kil (lock) manghil kha ua, Vanleeng ang len hun in ang kihei lele lai in, box sung a gul umte abanban in ang pot doh ta ua, Vanleeng tung a tuong ten Gul zat tuomtuom hing potte amuta uhi. Passenger te zau in aki kou ua, khenkhatte ashikhiel uhi. Neukhat a hangsan deuten mun tuomtuom a gul in asuhkhah theilouna din akal ua suotat theina ding lampi a sui uhi.

Air hoster-ten Pilotte sil umdan ahil ua, tuachin Pilot ten a ground a air traffice controller te ava hil sawn uhi. Ground a air traffice controller te ava hil sawn uhi. Gound a thunei ten ka bawlkhiel mama ta uh tam gul umna box pen chabi lock kana manghil kha uhi. Tam gulte pen khovel a poisonous pente ahi uhi chin agen ua, Pilotpa khun a le heimun ah Vanleng kanga (lending) thei

ding uoi? Gul in passengerte atuh masang in chi'n zauthong pum in a dongta uhi. Ground traffic controller te laha a bose pa khun (landing) lou ding minute tomkhat hing ki ngaituo phot vang ka chia, Pilot pan zong awle.... achia hinanleh a thugen pen phattuom lou asa, a lungsim zauthawng kawm in ground lam ah a bosste order a ngah a, Pilot pa a ding in tudinmun pen minute

khat ngah zong a hamsa mama mai a hinanleh order khu a zui a minute tomkhat zou ah khun a Boss pa un thu ahing theisah a altitude bangzat in na leng ei achia, Pilot pan altitude 300 achia, sangdeu in leng in achia, Pilot pa in ale gul in hing tulum gam sieng ding ata vele? achileh a boss pan order zui van in a thugen pen a gen zousah sih a Lenna pen lengsang deudeuta tuachi'n Boss pa in a dongkia a, altitude bang zat sang in na leng tai? Pilot pa in altitude 500 achia, lengsang zaw deu in a chi kia a, Pilot pa in zong lamdang asa a, hinanleh order pen azui mai a, a lengsang deudeuta.

A tunglam sangtah a alenlai in boss pan a hing dong kia a, altitude bangzat ahi tai? Tun 1200 tan ka tungta chi'n Pilot pa in a dawng hi. Tun tam altitude ah pen lengzing in a chia, Cabin Crew te leh Air hostess te kung ah tam altitude ah pen poisonous gulte khu zauhualou (harmless) ahita chiin vagen tan chi hi.

Bangma zau ding aum non sih. Gulte na khut un man unlen Box sung ah va khum lutkiata un. Box chabi pen hing kil (lock)

ding hing manghil nonsih un, achia, a boss pa thugen khu adih a, Cabin Crew te khat in gulte a man a, akhut in akhoi a, gul zousie zong a zoi gam siengta hi. Gul ten zong bangma alaw non sih hi. Gul zousie azoi gam siengta ua, khatma zong apie non sih hi. Passenger ten zong gulte akhut in a khoi ua, a utdan dan un apmai na'n a zangta uhi. Hun tomkhat zou in Vanleng tung ah gulte kimawlma mai a suohta hi.

Khenkhat in aman ua, box sung ah akoi lutkia ta uhi. Passenger khat in Gul vom khat aman a tam gul vom in ang suzau mama a, tu'n ken ka utut ka law theita hi achia, khum hun pen Vanleng sung a sil zauhualou abeina ahita. Passenger zau a shibuh te zong ang haldolta ua, khuo ang theita uhi. Bangkim ang Normal kiata hi.

Tua i ngaituo ding uh bang atai? Tam tangthu apat bang na zil doh ei? I hinkhuo tambang hamsatna (Problem) imaituo tou ding ahi. Hinanleh ei gingtute a ding a bang e a poimaw pen ichi leh PASIAN NAINA altitude pen isuh sang zing angai hi. Pasian

toh iki nai zing a, ikizopna i puophat zing leh khovel a sil zauhwoipen pente zong bangma lou a suoh thei a, zong ang kipelsah thei hi. Aziehpén Jesu Khrist min in tam khovel silte in thuneina (power) sil bawltheina neilou uhi. Pasion toh ikinai zel lou zieh in khovel silte in ahing subuoi zel a i na zauthawng kha

zel uh ahi. Hinanleh Pasion toh ikinai nah a, ahileh tam Setan silbawltheinate pen bangma lou ahimai hi. Sil bawltheina abei zel hi. Isai 40:31 in agen bangin Mute banga ha a sangtahn leng vaui. Tam khovel gitlouna zat tuomtuom ihinna susetheite in hing subuoipha lou ding ahi.

.....

LUNG AŴI LOUNA KHOVEL

- By: Evan. Retd. Upa Chinthong, Tongdam

K^{hovel} kotta ah ka dah a lungkimna gam heilam ah um ei chin kasuisui a amun ding kamu zousih.

Sapgamte kangaituo a amaute ahausu in sil abawlthei ua a innsung ua pat khovel pumpi autna lamlam en in leitung sil mawngmawng a tasam umlou in a utna lamlam uah avah ua, hinanleh alungkim thei diehlou ahi ding uh a, Nungah, tangval khenkhat ten ahinkhuo uh aning ua, nih leh puon hoi tahtah sil ding zong nopsalou in puon se deldul in akithuom ua Hitpis kichi in khenkhatte vun kangning in atuom na ding un tuisuogiet

pang nisa nuoi ah akiphou ua, hinanleh lungkimna amutuom sih uhi alungkham man leh hindang peilou in milioner tampi akikhai lum uh.

Eigam ah zong hinkhuo lungkim taha mang mu ding atamsih; Singtang a umte phaigam a um ding aut ua, hinanleh phaigam a um nu leh pa tamtah tate zieh a lungkham a talpang son zen a i mutheilou tampi um Khanglai khenkhat ten lungkimna ding sui

in Zu leh Sa ane ua, Khamthei chituomtuom bawl in atahsa uh nasan ashi law hiel ua hinanleh zong tuana zong lungkimna tahtah amu zou dieh sih uh, lungkham na leh beidon nan a dim ua atop ah ashilo uhi.

Politician ten zong aparty abawl ua maban sep ding tampi nei a kinepna tangvum a adinlai uh anopsah lai uh ahizaw atupna mun uh atun chieng un zong a le a lungkim thei tuom sih ua, lungkim sang in apuoh gih uh agih deudeu zaw amai lam uh angaituo chieng unleh lungkim louna khovel lungkim sang in, talpang son a kinga vungvung atam uhi.

Tuachin mi khenkhat in Hattuum a lungkimna ding asui ua, hinanleh amutuom sih uh. Khovel gam leh eima hinkhuo ah lung awi na ding mawngmawng a um sih. Simlei Aigupta gam ah khun muon na leh nopna ka sui a guobang hinsung mansieng

tum in kana leh lungkham na bou ahi. Aw i pienna gam in azil nonlou muonna leh nopna sui nanleng muzou sing e amun hilou kamang Khrista gam ahilou zieh in laphuoh tun achibang in lungkimna leh kipahna pen Jesu Khrist a um ahi. Shina liim guom tawn nanleng zong zau non vot sih vang nang in nei umpi a na Belam chin na chieng leh teikhut in nei humbit hi. (Ps.23:4) Jesu Khrist a um zing khu gentheina, hahsatna, lungkhamna, Humpi bahkai leh Meikuong lah a um nanleh lungkim tah leh kipah tah in apeizel uh Dan. 3:6; 6:16- Khovel hausatna sum leh pai tampi nei nanlechin Jesu Khrist panglou a bangmalou mai ahi. Eccl. 5:10. Tuaziehin Jesun Khrist a um gigete khu lungkham na beidonna mun a zong lungkim tah leh kipahtah in aum zel uh. Mangpa hita aum ei adin anop hi, pha nasah leh Bawh 3(thum) khovang Mosi ding khat Eliza ding khat Nang a ding khat achi (Math. 17:4).

.....

THUOHNA KHU GUOLZAWLNA AHI

Gingtuten Hagau lama kal i suonna uh, ahin eima phahna chieng tan in hahsatna thuohna i nei chiet ua khum ziehma in a poimaw mama khu i dawn dan uh ahi hi. Guolzawlna himhim pen a suollam a, adihlou lam ah zatthei vah ahi zing bangin Vangsietna ichi diei thuohna, hahsatnate zong guolzawlna tansah theilou a um a, ahivang in a tung a igentah mabang un a dawngtuten idawn dan ua, thu apuo hi chi ithei chien ding uh apoima masa ahi.

1922 kum in Zakrador khawmpi ah Edwin Lowlands in “Thuohna” hi Pasian hepina silpieh ahi a chi hi. Pastor Tower in Suongkul a taan lai in “Khros lou in Lallukhuh aum sih” (NO CROSS NO CROWN) ana chi hi. Laibu giel siem minthang Shakespear in Vangsietna khu Uphoh (toad) banga melsetah hinanleh zong suongmantam apuo ahi ana chi hi. Tuaziehin vangsietna thuohna leh lungkhamna ahi. Tam nah itheite zousie pen ei mau a ding a guolzawlna tuntut ahi veh thei hi chi i pawmngam uh angai hi. Gintu hinkhuo ah thuohna huoise pen hi a ithei te in zong suongmantam hing neisah ngei ding ahi chi musiem thei ding a ngaiven zing kawma beidong mai hilou a, sil i zil chien pei

uh a poimaw zel ahi. Tam bang dinga khun lungsim lam ah zong ki singsah tha zel hi ana poimaw tah zet ahi. Sadhu Sunder Singh in hichin ana gen a, tam khovel ah khun Kross ipuoh sih leh pen dachiengin van ah pen Khros puoh kiana ding hun lem chang mu non lou ding ihita uhi. Thuohna a lohndan muchientute in mihing hinkhuo ah thawkiana te pen Gou luul zaw bawl dohna ding a hun lemchang hoipen ahi chia; a thei chien ua, tam thuohna khu guolzawlna naah ahi chi theichien in angai luul ma ma zel uhi. Khovel a mi thupi chite zong thuohna, lawsapna leh beidawnna tampi ana peiliem zelte ana hizel uhi. Mi thupi leh zattah banga kilang ngailoute tam hasatna leh mawpuohna gihtah nuoi apata

khun mi hattah leh zahtah ahi lel a ahing kilang doh zel ahi. John Bunyan pen Pasion thugen mi ahia, A Pasion thugen ziehma in suongkul mieltah sung ah khun kum 12 zet khum in aum a tam hun lai in azi Elizabeth in atate hahsa tah mai in ana enkol a, atanu upapen in vangsiyet umtah in amit ataw nalai a tambang a liengvai tah leh genthei taha a khosah lai un atate khat ahing shi kia nalai hi. Bang chi tuh in ahamsa ta diei? Hinanleh John Bunyan pen Pasion in aumpi zing a kum 12 sung Suongkul a taan sung in lekhabu thupitah tah tampi ahing giel doh law hi. Khenkhatte pen Khristian vangam zotna munsip alohdan “Hagaua thumna” khopi siengthou hepina luonglet chite a dangdang tamtah agiel doh a, a lekhabu hing gioldoh zousiete hi khovel pumpi sangtampi Hagau lamah a phattuompi uhi;. Guolzawlina a dawnna uh ahing hitou peh hi. Suongkul polam ah zalen taha a thugente khu ahing la a miten lohpi mama nanleh uh tuni tan in nnasepna tung zing leh thupi pente khu tam Suongkul sunga alekhabu

gielte ahi. Laphuohtu thupi khat Reboult in bang laa ahing phuohta ei? chi a adoh uleh “thuohna” chiin adawng hi. Laphuoh leh lekhabu giel lam a minthang mama Milton pen mittaw ahia, agenthei ahasatnate pen khovel a dingin guolzawlina ahing suoh tahi. Shinate pen hinna deium tah siemtu ahi uhi. Thuohnate pen loupina Manglukhu hing khuhsahtu ana hi peh hi. Gentheina pen hausatna luul zaw hing pie lungkhamna khu kipahna gensenglou a hing navahsahtu ana hia, beidawnna in a suhbuoi phah louna mun thoveng tah ah khun zalen tahin ang umсах hi. Vah chau miel tellou a liimna na chau lungkhamna pangloute nopsahna ngen, hamsatna pangloute khu mihing hinkhuo tahtah pen a chingzou sih achi uhi. Thuohna, hahsatna, zieh a beidong a kuun mai lou in kei a ding a guolzawlina hing tung ding pen bang ahei chiin ngaiven in Mangpa’n hing musah van in hing pegei ding ahi. Ahun chiema pel ngailou PASIAN ahi.

*Muanna Ahsi July 2017 issue
apat lahsawn*

MANGPA NASEP DING DAN

Gingtuten theichien ngeingei dinga poimaw pen khutnasep zieha hundam hilou a, athawna ginna itan uh ahia, eima nasepna himhim pangtheilou i pansah som pou leh buoi mai ahi. Hinanleh hundam “Ta” khat theichienna khu anasep ah ahi kia hi. Khumziehin Paul in kichientah in ana gen dan hi. Lungsietna zieh a ginna ah khun hundamna hi ngal un. Tampen nou mau apat pot hilou in Pasian silthawnpieh ahi. Nasep zieh ahi sih a tua chilou in mi kisuongla khava uh silhoi sem dinga Mangpa Jesu a siem a um ihi. Ama khut suoh ihi ngal ua, tam silhoi khu i khosahdan dingua Pasian in aguot kholsa ahi (Eph. 2:8-10). Tuachiin gingu khun hundamna athawn a kimu toh hundam “ta” khun Mang nna asem ngeingei hi chi theichienna anei uhi. I Bible ah Mangpa nasep dan ding hoitah in ang hil ahi.

1. A shisa hingkia bang in Mang nna isem ding uhi. Paul in Korinth mite kung ah Mang nna isem ding uhi. “Ahingte zong amau a dinga hing hita lou in, ashitang ua shi a thoukiapa ding a ahinzaw theina ding un mi zousie shitang in ahing shita hi. Anagen khu ahi (II Kor. 5:15). A shi ding lai ang hing a, Mangpa nna asepmawngmawng kigen kha nonlou pen Barabba ahi. Avangphat mai zen toh maw?
2. Kipah tah in Mangpa nna sem un Sam gieltu in ana chi kia, (Sam No. 100:2). Kipah lou kawma zong Mangpa nna septhei ahi. Mang Jesu Khros puohpi dinga azat kom uh Kurini khuo a Simon pen kipah lou ding ahi. Ama thu hiloua puohsah ahi ziehin tam bang sem hikhah ding pen zauhuoi umtah hiding ahi. Eima deiteelna toh Kros i puoh leh kipahna um hi.
3. Zau leh liingkawm in na hundamna nna sem um” chin Paul in ahileh gendan tuom

in ahing genkia a, (Phil. 2:12). I hundamna loupidan khu ngaituo in Mangpa lung atunlou khah ding zau in. Ama kipahna din isem ding ahi. Hundamna umna ding hilou a, hundamsa i hi tah ziehun bang chi'n semlei Pasian kipahna ihi diei? chi khu gingtukhat in a ngaikhoh ding ahi mawng ahi.

4. Mangpa nna pen ihepi zieh ua ana isep ding ahi. Peter khu I Mangpa Jesun a thawkia hun ah khu sildang himhim a dong sih a, nang hepi ei chi ahi mai hi (John 21:15). A ma i hepi leh

athupiehte izop ngai, Ama i hepi leh a Belamte ivah ngai. Ama ihepi leh ei leh ei iki hepi ding ahi. Mangpa toh kizopna ding in hepina panglou in ahitheh sih.

5. Kinepna ziehin Mangpa nna isem ding ahi. Anasep mai hilou a thuoh ding zong ihia, i thuohthe khu tunung a loupina hing kilang dingte toh tekah khamlou ahi ziehinn Paul in tam kinepna zieha thuohna pen tam zat zouzai khu a thuoh muolsuoh ahi (Rome 8:18).

*Muonna Ahsi August 2017 Issue
apat lahsawn.*

.....

MUOL TUNG A JESU THUGEN

(Mathew 5:3-10)

- Upa Khupsuankham

Mangpa Jesu leitung a ang peilai in kizilsahna leh thugen tampi anei a, tuate lah ah tamlou genvai. Muoltung a Jesu thugen in Mahatma Gandhi tungtang akhoikha hi. “Tami thugenpa ‘Jesu’ dam nalai leh kalawm hoipen ahi ding hi” achi hi.

Lungsim a gentheite: a hamppha chi in mikhiel kisa a Pasian mitmu a chinglou kisahna thu gen ahizaw hi. Tuabang mite khu ahampha ua, pientha ding leh hundam ding a maban neite ahi man in Vangam lutding uhi.

Lungkhamte a hamppha: Chi umjie khu - thumanlou pou gen leh zawnman-neilouman leh ngauman a lungkhamte genna hilou in, shi suun mite suunpi a, vangsete gentheina thuhte hepina leh lainatpite ahampha uhi. Amauhten zong vangsietna atuoh chieng ua Pasian in hamuon ding ahiman in.

Thunnuoi lutte hamppha: Chi in amawpuohna uh thei a, nasemte hamppha uh leitung hausatna pieh a umding ahidan uh genna ahi. Kingaangiem tah a nasem a sum-le-pai zong miten leigouluo ding uh ahidan zang zilsah hi. Ei mihingten ing neisim a, ing hausat chieng uleh siemna-pilna sang leh degree sangtah ing nei chieng in iki thupisah ua, Pasian in piehtaahlou in angkoi khajel hi.

Dihtatna lunggul a gilkiel a dangtahte ahampha: Chi in, igam sung i-et chieng in dihtatlou nate, puohnatna, khawhsahna nei a laina atawm a, lainat malah a dihtatte leh mi thutahte huo leh muda a dem bang i-um zawsop uhi. Hinanleh tuabang kaal ah dihtatna poimaw ngai a lunggulpen deipen a nei mite khu ahampha ua, Pasian in amaute taina leh gilvana peding ahi man in.

Zangaitheite ahampha uh: Chi in midangte hasatna theipi utlou leh mite thuohna thuohpi utlou leh hepina neilou leh zangaina neilou mite tung a zangaitheite khu Pasian in zong zangainatoh adinkia ding hi. Sisan suote khu sisan mama a thuh a umding, mi sietna ding bawl mite tung ah Pasian in sietnama in athuhkia ding a, zong suh muolphou ahi ding uhi. Tualeh mite awhna ding a thangkamte khu Pasian in amaute mama athangkam uah a awh ding uhi” achi hi.

Lungsim siengthoute ahampha ua: Lungsim sia kisa a, lampi kawi

bang a kawite bang, lungsimsie, hoilou bang a umte bang piengtha theilou uhi. Hinanleh pienken lungsim siengthou leh hoite khu Piengthabai sese ua, tuabang miten Pasian amubai ding uhi.

Lemna bawlte hampaha: Chi khu numei bang a thusie gen a ahoi ding theina zen a kaikawi teitei mite khu Pasian ina chiemte hi. Tuabang mite innsung khosah leh asilbawl uh lamzang ngailou ding hi. Pienken lungsim hoi leh kituohna dei a lungsim nei mite ahampha uhi. Mihing leh mihing kikal a lemna bawlte ban ah Pasian thu-awilouten Pasian awisahte khu lemna bawl hai uhi. Pasian ta kahi chia lemna deilou mite khu Setanta ahi jieh un, lemna khu adel indelvai!

Dihtatna a thuohnte hampaha: Chi umjie khu mawna leh khelna jieh hilou a ithuohnate uah kipah ding in Mangpa Jesun ang nasinsah a,

Aman zong ana thuoh zouta hi. Pasian in tuabang a thuohnte amang hilsih hi. Mangpa Jesu thuohna khu Pasian in achiemte a, phuba ala hi. Pasian midihnte thuohna khu Pasian in a ngaikhawh a, aphuoldap ngaisih hi. Mani mawna pomlou a thuohna khu hamphatna ahi chi'n Mangpa Jesun ang nasinsah hi. Midihtatte khu midih tatloute khu midih tat loute muda leh huot a aumjel ukhu ahi ding mawng ahi hi. Viveh Nand in, "Truth must have no compromise" chi'n zong ana gengen hi.

Mangpa Jesun muoltung a athugente nua-etkia in, hinpi in shitan a zong shipi ngamchiet lei Pasian kipahna huongsung ah ilut peelmaw ding uhi. Mahatma Gandhi in Jesu thugen angnainat mama bang in gingtu leh Pasian nasem chia kiminwaw ten kipahpi in jui sawm chiet vai.

.....

ZPWF Column:

KIPATHU GENNA

Pasian mapui leh umpina toh apeisa July 01, 2017 a P. C. Wales General Assembly Khawmpi mang a va haw Rev. Stephen Chinzathang, Sr. Executive Secretary, ZPCS, i/c ZPWF in ZPWF Project Tunnu Limbel panpina ding PWF Wales te apat Rs. 82,880/- ang mu a, PWF Wales te leh pan hing latu i/c ZPWF kung ah ZPWF in nasatah in tam i Tangkou tungtawn in kipah thu a kigen hi

Mangpa'n ama leh a innsung mite umpi in mapui zing henlen, alampite ah lamzanna petou zel in Pawlpi adia mi manpha hitou zel ding in guolzawl ta hen.

Lungdam ung,

ZPWF Sih-le-taang in

Sd/- Nu Tingzavah

Chairperson

24 JULY, 2017 TO 21ST AUGUST, 2017 SUNG A TUNNU

LIMBEL PANPINA PETE

1. Presbyterian Church of Wales	Rs. 82,880
2. Nh. Ruth Niangkhanching, Tuibuang	Rs. 2,000
3. Nu Chingzaniang, Zomi Colony	Rs. 1,000
4. Sye Hauminthang, Nungshai	Rs. 100
5. Nu Nianghauchiin, Lailamveng	Rs. 500
6. Pa Tungsuanpau, Lailamveng	Rs. 100
7. Rev (Retd). Kamkhosoi, Zomi Colony	Rs. 200
8. Daikhanmang, Behiangjang	Rs. 100
9. Kaplamching, Behiangjang	Rs. 100
10. PWF Gunpang District	Rs. 3,240
11. Nu Ngaimang, Mangjing	Rs. 100
12. Esther Neiching, Central Church	Rs. 200
13. Rev. Zamlianpau, Lailamveng	Rs. 1,000

14. Nu Zamneihsat, Central Church	Rs.	200
15. Nu Chinghauching, Central Church	rs.	100
16. PWF Zomi Colony	Rs.	1,800
17. PWF Moreh II (MGP)	Rs.	3,090
18. PWF Moreh I (MEP)	Rs.	2,000
19. Nu Hatniang, Moreh I	Rs.	10,000
20. Upa Langkhokam, Moreh I	Rs.	3,000
21. Upa Kamkhai, Moreh I	Rs.	2,000
22. Upa Suanthang, Moreh II	Rs.	1,500
23. Upa Hausuanhang, Moreh II	Rs.	1,500
24. Pa Johny Thangmuanlian, Moreh II	Rs.	3,000
25. Mrs. Flora Hatnu, UK	Rs.	33,000
26. Nu Hielzaniang, Zomi Colony	Rs.	400
27. Nu S. Niangsuanching, Lailamveng	Rs.	500
28. PWF Lentang District	Rs.	1,780
29. PWF Zomi Colony		
Anntang Kg. 49 & Anntang tang	Rs.	400
30. Pa Suanpau, Muollum	Rs.	100
31. PWF Belpuan, Anntang tang in	Rs.	560
32. PWF S. Muvanlai khuo	Rs.	1,500
33. PWF Imphal	Rs.	8,300
34. Pu M. Sesei Zou, Imphal	Rs.	5,000
35. Pu M. Hausei, Imphal	Rs.	8,000
36. PWF Tonjang, Anntang	Kg	50
37. Upanu Niangneikim of Zomi Colony apat naupang Toka-3, kamis-3, T-shirt-2, Puannahtual-16.		
38. Nu Veineilam of Zomi Colony apat naupang Toka, puonnah-21		
39. Maukot Hattuom te apat Bete, Maite, Begul		
40. Nu Chinglian of Maukot apat Ai-eng Kg-1		

Adihloute Office a suhdih theizing ahi.

Petu zousie Mangpa'n hing guolzawl in hing mapui zing taken!

.....

PATRON MEMBER-TE

1. Upe Gouzamang	2. Pu Hov. Khamchinkhup	3. Pu Khamzalem	4. Pu Chinzausan
5. (L) Upe Liansuanpau	6. Pu Khamchinthang	7. Pu S. Dalhang	8. Upe Kaphkhang
9. Upe Langlimgang	10. Upe S. Nangkhanal	11. Pu S. Lamkhathang	12. Upe Dr. M. Lachinkhel
13. Upe Khamchintam	14. (L) Upe D.K. Maniun	15. Upe Suanthamang	16. (L) Upe Khupgou
17. Upe Chinkham	18. Upe Ngulchinkhem	19. (L) Rev. V. Vungzalen	20. Rev. Reld. Kamthasoi
21. Rev. Tualachin	22. Rev. (Rtd.) H. Nengzalen	23. Rev. Awnkhanthup	24. Rev. Dr. Hengpi Maniun Zou
25. (L) Pu Tuzanzpau	26. (L) Rev. Ginchintam	27. (L) Rev. Khamzasan	28. Upe T. Lamkhathang
29. Upe Khamchintam	30. Rev. Stephen Chinazhang	31. Pu Khupkhamang	32. Pu Khaldohlan
33. (L) Hov. Khamzhang	34. Pi Vungzuam	35. Pu T. Gouzadou	36. Upe Liansuanpau
37. Pi Zekthachin	38. Pi Hethamvung	39. (L) Pi Ngathachang	40. Pi Manthamng
41. Pu Goukhamang	42. Pi Chingzalem	43. Pu S. Thianzakhel	44. Pi Kamthanching
45. Pu Haulkhanpau	46. Pu Tualimang	47. (L) Pu Dongkap	48. (L) Pi Chingkhamang
49. Pi Dangkhan	50. Upe Hanzakhup	51. (L) Pu Selchinpau	52. Pu Goumang
53. (L) Upe Khamthanthang	54. Shie Lenzkhanal	55. Pu Khamkhamun	56. Upe L. Tualkhanpau
57. Upe Jamzalamang	58. Upe Ginzadong	59. Pu Kalzathang	60. Pi Gouzauom
61. Pi Thangnelah	62. Pu Khamzathang	63. Pi Danchin	64. Upe Liankhamang
65. Pu Haulchintun	66. Pu T. S. Lal	67. Pi Gochin	68. Pu T. Khupchinthang
69. Upe T. Kalzalem	70. Pu Paul Hengkhol	71. (L) Pu Solkham	72. Rev. P.C. Munga
73. Rev. Khamchinkhel	74. Rev. Jamkhanpau	75. Rev. Chinzapau	76. Rev. Reld. Kamkhazam
77. (L) Upe Chinpu	78. Pu Zamkhamthang	79. Pu Chinglen	80. Miss Chinkhauing
81. Upe P. K. Sole	82. Pu Goukhel	83. Pi Nangkhamang	84. Even. Reld. G.L. Jashya
85. Pi S. Chingkhamang	86. (L) Pu Vumchinkhup	87. Upe Khathanthang	88. Upe T. C. Pau
89. Upe Nengchinkap	90. (L) Upe Jamkhongam	91. Upe HT Munga	92. Mrs. Vahkhaling
93. Pu Haulkhanpau	94. Pi Chinmu	95. (L) Upe Ngulzakhel	96. (L) Upe T. Gough
97. Pu Ginzauzau	98. Pu L. Langminthang	99. (L) Rev. David K. Samte	100. Upe T.B.K. Samte
101. Upe S.K. Khama	102. Pu Jamkhopeo	103. Pu Thethang Tethul	104. Pu Kamkhanpau
105. Bhim Pressad	106. Rev. M. Kapsuanthang	107. Nu Chingnelkim	108. Rev. Khupkhamang
109. Pi Mannuamching	110. Rev. Kalmuanlal	111. Upe Nengkhamun	112. Nh. Deboreh Zou
113. Pu T. Kuppa	114. Rev. Mungsuathang	115. (L) Pu Lamchintau	116. Upe Pauchinel
117. Nu Kimmehol	118. Pu Kamganpau	119. Nh. Nangsuannuam	120. Nu Ngakhamvung
121. Pu P. Sanjiv Zou	122. Upe M. Keichinkham	123. Upe T. Sianchinpau	124. Upe Sianzathau
125. Pu L. Thenghsoi	126. Pu Kamsuanhang	127. Upe Th. Keikhoam	128. Upe Lunchinthang
129. Pu P. Tongthang Zou	130. H. Nehzang	131. Pu Thangsuankhup	132. Upe M. Kamzadou
133. Pu Jamkhoson Munkuo	134. Pu Sianzakhel	135. Upe Thangsuannuam	136. Even. Bhim Pressad Ghelani

LIFE MEMBER-TE

01. (L) Upe T. Khupkhanpau	02. (L) Pu M. Ginzahau	03. (L) Pu Selzapau
04. Pu L.C. Paulungnung	05. (L) Pi Khamkhamnieng	06. Pi Ngauuom
07. Pu Chinsuanthang	08. Upe Shanli Kumar	09. Pu Kamkhahau
10. (L) Pu Khamkhahau	11. Upe Khamzathang	12. Upe Chinkhamthang
13. Pu Tongzathang	14. Pi Chinneilem	15. Upe Kulthang
16. H/Sm. Upe Kaichinpau	17. Pi Nangzalem	



Undelivered

Please return to:

The Editor

KHIRSTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

e-mail: zpcs@rediffmail.com / zousynod05@gmail.com

Synod Office Telephone No. (03874) 235105

Website: zousynod.org

Ta,
